

avec les Hurons, la terre fera toute belle, la riuere n'aura plus de vagues, on ira par tout fans crainte: Vn Capitaine Algonquin reconnoiffant la fourbe de cét imposteur, luy respondit d'vne voix plus forte, & d'vn ton piquant: Le repreſente toutes les Nations que tu as nommées, en leur abſence, & ie te dy de leur part, que tu es vn menteur: Si tu venois pour parler de paix, tu déliurerois du moins vn de nos priſonniers, ſelon noſtre couſtume; tu ne ferois aucun acte d'hoſtilité, & tous les iours tu es aux aguets pour nous ſurprendre, tu maſſacres tous ceux que tu peux attraper; cela dit, chacun ſe retire en ſon quartier.

Cependant le canot qu'on auoit depeſché à Kebec, fit vne tres-grande diligence: [152] Monſieur le Gouverneur ayant receu les nouuelles, arma en vn instant vne barque & quatre chaloupes, prit avec foy le Pere Vimont noſtre Superieur, vogue contre les vents & contre les marées; mais voiant que la barque n'auançoit point, il prend le deuant avec ſes chaloupes; les matelots & les ſoldats ramoient à toutes forces: Enfin, ils arriuerent aux Trois Riuieres plutoſt qu'on n'eſperoit. Si toſt que l'ennemy les apperceut, il ſe reſſerra dans ſon fort; il eſtoit neantmoins ſi enragé contre les Algonquins, qu'vne heure auparauant que Monſieur le Gouverneur les allaſt treuuer, ils ſe jetterent ſur vn canot Algonquin, conduit par deux hommes & vne femme; celle-cy fut tuée, l'vn des hommes fut pris priſonnier, & l'autre ſe fauua. Le iour precedent Aneraſi, Capitaine de guerre des plus hauts Algonquins, s'eſtoit fauué de leurs mains, les ayans apperceus de loin à l'emboucheure du grand Lac, voſſin des Trois Riuieres, où ils gardoient toutes les auenuës, par la multitude de leurs canots.